

四庫全書

史部

欽定四庫全書

史部

景定建康志卷十五

六

詳校官監察御史臣沈孫璉

檢討

臣

德生覆勘

總校官檢討

臣

何思鈞

校對官中書

臣

張曾炳

膳錄監生

臣

張龍升

欽定四庫全書

景定建康志卷十五

宋 周應合 撰

志總序

倚相讀九丘史遷作八書丘以州別故九書以類從故
八班固志而十之丘與書之法備焉志者識也後皆因
之元和有郡縣志元豐有九域志天下郡縣各有志此
建康志所由作也建康為今留都視他郡尤重今考其
地自有城邑以來千七百年間因革凡幾為城為邑為

州為府為郡為國為都其治不同也曰金陵曰江乘曰秣陵曰建鄴曰丹陽曰江寧曰昇曰建康其名不同也或置州刺史或置郡太守或置府尹或建帥閫或建大都督行臺或建節鎮或封侯王其制又不同也至於山川之形勝風物之表著興君誼辟之代見忠臣烈士之世出盛衰得失之可示勸戒者豈一簡所能盡哉於是彙而輯之為志凡十一曰疆域二曰山川三曰城闕四曰官守五曰儒學六曰文籍七曰武衛八曰田賦九曰

風土十曰祠祀屬辭比事其目各著於篇

疆域志一

金陵古揚州之域在周為吳春秋末屬越楚滅越併有其地始名金陵秦兼諸侯置郡縣屬鄣郡改秣陵漢興封韓信為楚其後更封諸王荆吳江都是也武帝初置刺史屬丹陽郡後漢因之建安十六年孫權自京口徙治秣陵明年改為建業晉武平吳以為丹陽郡及揚州刺史治建興初改為建康元帝渡江都焉以宰相領揚

州改丹陽太守為尹宋孝武分浙江東為東揚州以揚
州為王畿尋復舊歷齊梁陳咸都於此隋平陳廢丹陽
郡立蔣州於石頭大業初復置丹陽郡唐武德二年為
揚州東南道行臺尚書省七年復蔣州罷行臺為揚州
大都督府九年州徙治江都以其地屬潤州貞觀七年
復為揚州治所至德二載析置江寧郡乾元元年改昇
州兼置浙西節度使上元二年州廢為上元縣大順元
年復置昇州天祐二年偽吳大城昇州建大都督府武

義二年改為金陵府天祚三年封徐知誥齊王建西都
改江寧府晉天福二年李昇僭位國號唐皇朝開寶八
年復為昇州天禧二年陞江寧府建康軍節度建炎三年
車駕南渡詔改建康府紹興七年駐蹕明年置留守古
稱金陵帝王之宅東南形勝之地大略可考自秦之南
遊隋之平陳將以厭其氣而析其地也然孫權據吳會
以鼎峙晉元渡江實為王畿宋齊梁陳因以有國其間
從事河洛規取中原幾致混一累朝衣冠禮樂號為中

國正統吳唐割據經營規畫用力勤矣識者謂開聖人
創垂之業而成中興恢復之功者實基於此稽之前代
因革分合名號靡常蓋自禹貢以迄於今為都者七為
治所者十有一為國者六為州者五為府者三為郡者
十有四而僑置者九為縣者十有九廢併者十僑寓者
四今屬於府者五類而辨之作疆域志

地為都

孫吳建都四世凡六十年東晉建都十一世凡一百三

年南宋建都八世凡五十八年南齊建都七世凡二十三年蕭梁建都四世凡五十五年南陳建都五世凡三

十三年

吳志及南史

吳志張紘謂孫權曰秣陵楚威王所置名為金陵地勢岡阜連石頭昔秦始皇東遊會稽經此縣望氣者云金陵地形有王者都邑之氣故掘斷連岡因改名秣陵今處所具存地有其氣天之所命宜為都邑權善其議未能從也後劉備東宿秣陵因觀地形亦勸

權都之權曰智者意同遂都焉又獻帝春秋劉備至京謂孫權曰吳去此數百里即有警急赴救為難將軍有意屯京乎權曰秣陵有小江百餘里可以安大船吾方理水軍當移據之備曰蕪湖近濡須亦佳權曰吾欲圖徐州宜近下也諸葛亮亦曰鍾阜龍盤石城虎踞真帝王之宅晉溫嶠議遷都豫章三吳之豪請都會稽二論紛然未有所適王導曰古之金陵舊為帝里孫仲謀劉玄德皆言王者之宅由是不行益

吳以來將欲經營四方未嘗不以此為根本云 六
朝事迹云南朝建都之地不過建康京口豫章江陵
武昌數處其疆弱利害前世論之詳矣吳孫策以會
稽為根本大帝嗣立稍遷京口其後又嘗住公安又
嘗都武昌蓋往來其間因時制宜不得不爾及江南
已定遂遷建鄴保有荆揚而與魏蜀抗衡其宏規遠
略晉宋而下不能易也故孫皓捨建鄴而之武昌吳
因以哀梁元帝捨建鄴而守江陵梁遂以亡李嗣主

捨建鄴而遷洪府南唐遂不能以立王導斷然折會稽豫章之論而以建鄴為根本自晉而下三百年之

基業導之力也

孫皓議遷都武昌陸凱上疏曰武昌土地危險非王都安國養民之處船

泊則沈漂陵居則峻危

蘇峻之亂溫嶠議遷豫章

三吳之豪請都會稽二論紛紜

未有所適王導曰古

之金陵聖王所居孫仲謀劉玄德皆言王者之宅古之帝王不以豐儉移都由是嶠等之議不行齊蕭

顗曾議遷夏口柳忱以巴峽未實不宜輕捨根本搖

動人心帝不從俄而巴東之兵至峽口遷都之議遂

息

梁元帝臨荆峽二十年情所安戀不欲歸建鄴

故府臣僚皆楚人並欲都江陵周洪正諫曰士大夫

言聖王所都本無定處若黔首未見入建鄴便謂猶

列國諸王今日副百姓心不可不歸建鄴南唐嗣

主用唐鑄計遷豫章而王都官舍軍壘十
不容其一二自公卿下至軍士莫不思歸
我宋中興

留都有錄已見書首

地為治所

越築城治長干里楚置金陵邑治石頭秦改為秣陵縣
治後漢分揚州置吳郡治建鄴建安十六年孫權自京
口徙治秣陵明年又城石頭改秣陵為建鄴吳既克關
侯都武昌以呂範領丹陽太守治建鄴永安中分溧水
以北六縣為丹陽郡仍治建鄴晉武帝平吳以為丹陽

郡及揚州刺史治太康三年分淮水北為建鄴南為秣

陵更置江寧縣宋孝武以揚州為王畿尋復舊

為都見前此不

重述隋平陳廢丹陽郡置蔣州治石頭唐武德二年為揚

州東南道行臺置尚書省八年為揚州大都督府貞觀

七年復為揚州治所至德二載改為江寧郡治所乾元

以後改為昇州治所仍置節鎮

寰宇記云天寶末明皇以金陵自古雄據之地

祿山方亂不可以縣統之乃置昇州加節制

上元二年復廢為上元縣光啟

三年還為昇州治所仍置節鎮天祐二年偽吳楊行密

大城昇州建大都督府其子溥改為金陵府治石晉天福二年建西都改為江寧府治李昇僭位號南唐因即居之至我聖宋初平江南置昇州治天禧二年改為江寧府治建炎三年改為建康府治紹興三年以府治建為行宮遷府治於行宮之東南隅詳見城闕志中興以來江東安撫司沿江制置司淮西總領所江東轉運司江淮提領所江淮都督府皆治於此詳見官守志

地所屬分埜

兩漢地理志吳地斗分埜隋地志自斗十二度至女七
度為星紀周禮保章氏注星紀吳分埜通典曰在天官
於斗則吳之分野晉永嘉中歲星熒惑太白聚牛女之
間識者以為吳越之地當興王者是歲元帝登寶位故
史臣曰星斗呈祥金陵表慶苻堅會羣臣謀南寇石越
對曰今歲星鎮斗牛福德在焉垂象弗差苻融曰歲鎮
在斗牛吳越之福不可伐此其大略

地所屬國名

吳國在周屬吳太伯之國有固城在溧陽溧水兩縣之間即吳所築也夫差為越所滅至漢高祖時以丹陽會稽豫章三郡五十三城立兄子濞為吳王景帝時國除東漢末以其地封孫策為吳侯弟權襲之曹操封為吳王三國鼎峙吳亦稱帝因都焉

詳見為都

越國越本夏少康之後封於會稽周元王四年用范蠡計滅吳盡有其地築城於此以謀吞楚

詳見越城

致貢於周

元王賜胙命為伯越兵橫行江淮號霸王後七世為楚

所滅

楚國周成王時初封熊繹於丹陽乃在荊州非此所謂
丹陽也其後國寢疆地寢廣至威王時滅越盡有吳越
之地置金陵邑於石頭詳見山阜及懷王末項燕自稱楚秦
滅楚以此地置鄣郡詳見所屬郡至漢高帝時封韓信於楚
鄣郡屬焉六年廢

荊國漢高帝六年羣臣請以故東陽郡鄣郡吳郡封劉
賈為荊王是年黥布反失國

江都國漢景帝既誅吳王濞徙汝南王劉非為江都王
治故吳國至其子建國除後以其地置郡

昇國皇朝天禧元年封壽春郡王為昇王嘉祐四年翰
林學士胡宿言陛下建國於昇猶次列國非所以重始
封之地宜進昇為大國無得封從之國朝會要大國二
十有四昇其一也

地所屬州名

揚州禹貢北距淮東南據海皆揚州之域唐虞置揚州

牧至漢武帝初置揚州刺史後漢因之分揚州之半置
吳郡治建業後以封孫氏晉太康元年平吳徙治建康
惠帝元康初有司奏揚州疆土曠遠統理尤難於是割
七郡置江州元帝渡江都揚州統丹陽吳郡宋孝武分
浙江東五郡為東揚州治會稽而揚州仍領丹陽等十
五郡大明三年以揚州所統六郡為王畿以東揚州為
揚州八年復舊景和元年罷東揚州隋徙揚州治江都
置大都督府以句容延陵曲阿等縣屬焉大業中廢唐

武德二年河間王孝恭平輔公祐以江寧漂水丹陽漂陽安業復置為東南行臺尚書省治江寧七年廢尋復為大都督府領上元金陵句容丹陽漂水漂陽凡六縣九年徙治江都貞觀七年復舊至德中復治江都秦觀揚州集序云漢刺史無常治後之稱揚州者指其所治而已

義州晉元帝置陳太建元年廢為建興郡領建安同夏烏山江乘臨沂湖熟凡六縣

蔣州隋平陳廢丹陽郡於石頭立蔣州唐武德二年廢
七年復置於金陵縣尋廢

昇州唐乾元元年以江寧郡改置昇州顏真卿嘗以昇
州刺史兼浙西節度使上元二年廢光啓三年復置天
祐二年偽吳封徐溫齊公大城昇州武義二年改金陵
府皇朝開寶八年復置天禧二年改為江寧府

茅州唐初置領琅邪金山縣後廢武德三年以句容延
陵復置七年廢

地所屬郡名

故鄣郡秦置漢元封二年更名丹陽郡吳永安中以蕪湖以南十三縣復為故鄣治宛陵

丹陽郡漢置治宛陵志云領宛陵於潛江乘春穀秣陵故鄣句容涇丹陽石城湖熟陵陽蕪湖黟溧陽歙宣城凡十七縣後漢因之建安十三年孫權分為新都郡二十六年權始置丹陽郡自宛陵治建業領縣十九永安中分置故鄣郡丹陽所領惟溧陽以北六縣晉太康元

年改建業復為秣陵宋齊間分丹陽立毗陵郡丹陽所
領惟建康秣陵丹陽江寧永世溧陽湖熟句容八縣隋
平陳廢大業初復置領江寧溧水以當塗來屬割延陵
句容等縣屬江都唐初廢為州天寶元年復置領丹徒
丹陽延陵句容江寧金壇凡六縣至德二載析置江寧
郡

建興郡陳太建元年以義州南瑯邪彭城郡地置領建
安同夏烏山江乘臨沂湖熟凡六縣屬揚州

江寧郡唐至德二載以潤之江寧句容宣之溧水溧陽
置乾元元年改昇州

義興郡晉永興中以丹陽之平陵永世及割吳興郡置
四縣立義興郡以賞周玘創義之功屬揚州

地所置僑郡名

淮南郡本秦九江郡漢立淮南王國後為郡晉治壽春
成帝初蘇峻祖約作亂於江淮石聰南侵淮南百姓南
渡者轉多於是僑立淮南郡以處之領于湖繁昌當塗

遼遒定陵襄垣凡六縣宋大明六年以淮南故郡併宣城入於姑孰隋廢以當塗屬丹陽更於壽春置

南琅邪郡晉元帝於江乘之金城立琅邪郡屬揚州領臨沂陽都及懷德三縣在舊江寧縣東北五十里成帝咸和六年復琅邪比漢豐沛宋大明四年以郡隸王畿五年行幸琅邪郡原遣囚繫陳大建元年廢為建興郡魏郡廣川郡高陽郡堂邑郡四郡並咸康四年僑立并所統縣並寄居京邑

南東海郡南東平郡南蘭陵郡晉元帝以江乘置四郡
穆帝時以南東海七縣出居京口

地所置府號

金陵府偽吳武義二年改昇州為金陵府大和五年偽
吳建都金陵尋罷天祚三年封徐知誥為齊王建為西
都改江寧府

江寧府天祚三年改金陵為江寧府石晉天福二年李
昇建國偽號唐皇朝開寶八年改昇州天禧二年以昇

州為江寧府置軍國建康命壽春郡王為府尹建炎三年改建康府

建康府建炎三年五月丙戌詔改江寧府為建康府節鎮舊號如故

地所統縣名

存者
丹之

上元次赤縣唐上元二年廢昇州以江寧地置屬潤州後廢寶應元年復置光啓三年置昇州屬焉通鑑云大順元年置昇州於上元縣以張雄為刺史縣初仍江寧

舊治白下村光啟中徙鳳臺山西寰宇記云國朝遷南唐司會府今府治之東御前後軍營是其地建炎徙今治在城東隅距行宮纔一里

江寧次赤縣

臨江歸化金陵白下

晉太康元年分秣陵置臨江明

年改江寧後廢永嘉中復置隋併秣陵建康同夏地入焉大業初屬丹陽郡唐武德三年即縣置揚州更名曰歸化七年號金陵屬蔣州明年徙白下村稱曰白下屬潤州正觀七年復名歸化九年復為江寧至德二載置

江寧郡而縣廢乾元元年復置屬昇州上元二年州廢
以其地置上元縣南唐割上元南十九鄉當塗北二鄉
因舊名復置隸金陵府圖經云古縣治南臨浦水在城
西南七十里實錄云南唐在州城西偏西即吳治城東
臨運瀆今天慶觀東即其地國朝移郭下在城西北距
行宮三百步輿地廣記云唐既改江寧為上元南唐復
析上元置江寧分治郭下

句容次畿縣漢置屬丹陽郡有句曲山其形如句字因

以名縣漢武帝封長沙定王子黨為句容侯國除復為縣吳赤烏八年使校尉陳勲發屯兵三萬鑿句容中道至雲陽西城以通吳會船艦唐武德二年於縣置茅州七年州廢屬蔣州九年隸潤州會昌四年升望縣乾元元年屬昇州上元二年州廢屬潤州光啟三年復置昇州縣隸焉國朝因之縣治在府東九十里晉毛寶傳燒蘇峻句容積聚峻頗乏食晉桓修傳王恭將伐南譙王尚之遣何澹之向句容修與輔國將軍陶無忌距之修

至句容而恭敗唐武德五年李靖討輔公柝兵先至丹陽公柝大懼棄城東走李世勣追之公柝至句容兵能屬者纔五百人

溧水次畿縣隋開皇中析溧陽丹陽置屬蔣州大業初屬丹陽郡唐上縣武德三年屬揚州九年屬宣州乾元元年屬昇州上元二年昇州廢屬宣州光啟三年復置昇州縣屬焉國朝因之縣治在府東南一百二十里唐武德二年杜伏威遣行臺左僕射輔公柝攻李子通渡

江攻丹陽克之進屯溧水龍紀二年孫儒盡舉淮南之衆濟江前軍至溧水楊行密使李神福拒之又行密傳大順二年孫儒屯溧水行密遣李神福屯廣德皆此地也

溧陽次畿縣秦置溧水所出南湖也漢初屬江都元封中屬丹陽郡前漢封梁敬王子欽後漢封陶謙皆為溧陽侯吳省為屯田志云封潘璋為溧陽侯又云孫皓封孫蔣為溧陽侯晉太康元年復置分為永平隋開皇十

八年併入溧水唐武德三年析江寧溧水復置隸揚州
九年隸宣州乾元元年屬昇州明年屬宣州尋復上元
元年又屬宣州未幾又復寶應元年屬宣州光啟三年
復屬昇州國朝因之舊治在溧水縣東南九十里天復
三年移治今所在府東南二百四十里通典漢舊縣子
胥奔吳乞食之所即此溧陽也元和郡國志溧水在溧
陽縣南六里

秣陵縣

金陵
建業

更治所凡六楚威王以其地有王氣埋金

鎮之號曰金陵秦始皇改為秣陵屬鄣郡建康實錄云
秦縣城在舊江寧縣東南六十里秣陵橋東北漢屬丹
陽郡武帝封江都王子纏為秣陵侯後漢復為縣孫權
據京口徙治改曰建業晉太康元年復為秣陵三年分
淮水北為建業南為秣陵宋書云縣治去京六十里今
故治村是也義熙中移於鬪場柘社實錄云在江寧縣
東南渡長樂橋古丹陽郡是也元熙元年省揚州禁防
叅軍縣治移其處圖經云在宮城南八里一百步小長

子巷內梁末北齊軍於秣陵故城跨淮立橋柵當是其地隋併入江寧景德二年置秣陵鎮今在江寧縣東南五十里

建業縣晉書太康三年分秣陵淮水北為建業建興初避帝諱改建康縣舊有城在吳冶城東實錄云縣治在故都城宣陽門內古御街東寰宇記云咸和六年徙出宣陽門外御街西建初寺門路東是也隋省入江寧

江乘縣秦置方輿志云始皇登會稽從江乘還過吳漢

屬丹陽郡王莽曰相武後漢復舊吳省為典農都尉晉武帝復置咸康七年析南境為臨沂屬琅瑯郡陳大建元年屬建興郡南史鄭襲嘗為令

丹陽縣漢元朔初封江都王子敖為丹陽侯後漢為縣晉封孫韶為丹陽侯南朝復為縣隋廢武德二年析江寧溧水復置屬揚州正觀七年省入當塗天寶元年復置縣屬丹陽郡非舊地矣

湖熟古縣名漢屬丹陽郡武帝封江都王子胥行為湖

熟侯一云姑孰後漢亦為侯國吳省為典農都尉晉武
復置陳屬建興郡漢興平二年孫策攻揚州轉攻湖熟
江乘晉蘇峻之亂毛寶燒句容湖熟積聚義熙九年罷
臨沂湖熟脂澤田以賜貧人宋元嘉二十二年浚淮起
湖熟廢田千餘頃二十八年徙越城流人淮南流人於
姑孰皆此地元和郡國志云在舊江寧縣東南七十里
今在上元縣丹陽鄉去縣五十里淮水北古城猶在
永平縣永安永世漢元封中置屬丹陽郡尋廢吳分溧陽復

置改曰永安孫休封弟讓為永安侯孫皓封孫洪為永
平侯晉武又改永世惠帝分置平陵并永世凡六縣屬
義興郡尋復舊名宋省入溧陽

平陵縣詳見吳國城下今廢

安業縣唐武德二年析江寧溧水置今廢

同夏縣梁武帝生於秣陵同夏里大同元年因以置縣
陳屬建興郡隋省入江寧圖經云縣東十五里有同夏
浦舊有城今上元縣長樂鄉是其地

臨沂縣本徐州琅琊國縣晉咸康七年分江乘西界僑置屬南琅琊郡陳屬建興郡吳蔡靚諸葛恢梁孟智陳明仲璋皆嘗為令實錄云縣城在京江獨石山西臨大江在舊江寧縣北四十里南徐州記云縣有落星山屬慈仁鄉去縣四十里今上元縣長寧縣攝山之西白常村蓋其地距上元縣三十八里

懷德縣費晉大興元年琅邪國人隨帝渡江者幾千戶立懷德縣以處之屬丹陽郡永復為湯沐邑後屬琅邪

郡其地寄建康北境實錄云縣城在宮城南七里建初寺前路東後改曰費移於宮城三里西北耆闍寺西宋元嘉十五年省入建康臨沂古跡編云費縣與琅邪分界於潮溝村在縣北九里今在上元縣鍾山鄉

即丘縣本晉琅邪國縣元帝置屬南琅邪郡宋元嘉八
年省入陽都

陽都縣本漢城陽國縣後漢改為琅邪國晉廢元帝置
屬南琅邪郡宋大明五年省入臨沂

地所接四境

建康府東西二百三十五里南北四百六十里東至本府界首二百四十里自界首至鎮江府四十里西至本府界首一十里自界首至和州八十三里南至本府界首二百四十里自界首至寧國府一百二十里北至本府界首四十九里自界首至真州一百一十里東南到本府界首二百八十五里自界首至常州一百八十五里西南到本府界首九十里自界首至太平州三十里

東北到本府界首一百三十五里自界首至鎮江府四
十五里西北到本府界首二十二里自界首至真州一
百二十七里自府界到東京陸路一千四百四十五里
水路一千七百七十里到西京陸路一千八百里水路
二千一百九十五里

上元縣附郭東西九十五里南北八十五里東至句容
縣界八十里以周郎橋中分界西至江寧縣界一里以
御街中分為界南至江寧縣界七十里以永豐鄉北白

米湖為界北至真州六合縣界四十九里以瓜步大江
中流為界東南到句容縣界七十里以東陳村為界自
界首到句容縣三十五里西南到江寧縣界四里以大
隱鄉為界東北到句容縣界六十里以章橋為界自界
首到句容縣八十里西北到真州六合縣界二十九里
以湖熟大江中流為界自界首到六合縣八十五里
江寧縣附郭東西八十五里南北九十八里東至上元
縣界一里以御街中分為界西至和州烏江縣界四十

里以鰻鰲洲大江中流為界自界首至烏江縣一十五里南至溧水縣界九十三里以烏剎橋為界自界首至溧水縣四十五里北至上元縣界五里以金陵鄉為界東南到句容縣界七十里以湖山鄉為界自界首到句容縣九十里西南到太平州當塗縣界一百六里以章公塘為界自界首到當塗縣一十七里東北到上元縣界二十五里以崇禮鄉為界西北到上元縣界五里以金陵鄉為界

句容縣東西七十里南北一百二十里東至鎮江府丹徒縣界五十里以山口為界自界首至丹徒縣五十里西至上元縣界二十里以周郎橋中分為界自界首至上元縣七十里南至溧水縣界六十里以丁塘村為界自界首至溧水縣三十里北至真州揚子縣界七十里以下蜀大江中流為界自界首至揚子縣六十里東南到鎮江府金壇縣界六十里以茅山崇元觀西堆為界自界首到金壇縣六十里西南到江寧縣界七十里以

上義山東綠楊村為界自界首到江寧縣九十里東北
到丹徒縣界六十五里以左橋為界自界首到丹徒縣
四十五里西北到上元縣界八十里以東陽鎮霸橋為
界自界首到上元縣六十里

溧水縣東西八十二里一百三步南北一百五十五
里三十八步東至句容縣界三十七里以浮山
頂為界自界首至句容縣四十里西至上元縣界
三十五里以烏石橋為界自界至上元縣八十

五里南至寧國府宣城縣界一百一十里以四
牌岡為界自界至宣城縣一百三十里北至江
寧縣界四十五里以上義山為界自界至江寧縣
七十五里東北到句容縣界四十里以望湖岡為界
自界到句容縣五十里東南到漂陽縣五十里以
分界山為界自界到漂陽縣七十里西南到寧國府
宣城縣界一百三十五里以崑山鄉為界自界到宣城
縣一百里西北到江寧縣界四十五里以烏剎橋為界

自界到江寧縣七十五里

溧陽縣東西一百五十里南北一百六十里東至常州
宜興縣界一十五里以葑埭牌為界自界首至宜興縣
七十里西至溧水縣界八十五里以三塔墩為界自界
至溧水縣四十里南至廣德軍界七十里以石屋山分
流為界自界首至廣德軍八十里北至金壇縣界八十
里以長塘湖港荻場為界自界首至金壇縣四十里東
南到宜興縣界八十里以白塔山為界自界首到宜興

縣四十里西南到宣城縣界一百二十里以湖東北岸
為界自界首到宣城縣一百三十里東北到宜興縣界
四十五里以五家村為界自界首到宜興縣六十五里
西北到溧水縣界七十五里以曹山陸路為界自界首
到溧水縣四十五里

景定建康志卷十五

欽定四庫全書

景定建康志卷十六

宋 周應合 撰

疆域志二

鎮市

淳化鎮在上元縣東四十五里鳳城鄉淳化五年置
金陵鎮在江寧縣南六十里本陶吳鋪景德二年改為
鎮

秣陵鎮在江寧縣南五十里

常寧鎮在句容縣東南五十里天禧元年以鎮置寨

下蜀鎮在句容縣北六十里

土橋鎮在上元縣東南六十里與句容縣兩界

東陽鎮在句容縣西北六十里郡國志云楚漢之際改秣陵為東陽郡因為名有館驛

江寧鎮在江寧縣西南六十里

鄧步鎮在溧水縣南一百二十里乾道四年正月差官收稅寶祐四年權鎮張師魯申府移東埧市收稅

孔家堽鎮在溧水縣南四十五里

固城鎮在溧水縣南九十五里

高淳鎮在溧水縣南一百里

舉善鎮俗名戴步在溧陽縣南三十五里

杜渚鎮在溧陽縣西南六十里乾道四年移稅額於溧水縣鄧步

古市按宮苑記吳大帝立大市在建初寺前其寺亦名大市寺宋武帝永初中立北市在大夏門外歸善寺前

宋又立南市在三橋籬門外鬪場村內亦名東市又有
小市牛馬市穀市蜆市紗市等一十所皆邊淮列肆稗
販馬內紗市在城西北耆闍寺前又有苑市在廣莫門
內路東鹽市在朱雀門西今銀行花行鷄行鎮淮橋新
橋宣橋清化市皆市也

舊志

考證南史徐度傳云徐嗣徽任約等來寇高祖與敬
帝還都時賊已據石頭市廛居民並在南路去臺遙
遠恐為賊所乘乃使度將兵鎮於冶城築壘以斷之

以此知六朝市廛多在淮水之北冶城之東也通
典梁有大市南市北市令大南北三市丞陳淮水北
有大市自餘小市十餘所隋食貨志言陳時淮水
北有大市十餘所置官司稅斂既重時甚苦之庾
闡揚都賦云其寶貨則瑤琨琅玕青碧素珉陽球散
火陰田潛珍雲英水玉錯耀龍鱗煥若金膏晃若銀
燭瑠璃冰清而外映珊瑚觸石而上翹牙簞列文於
象齒火布濯穢於炎焱西岵石城則舟車之所會東

盡金塘則方駕之所連 梁庾肩吾游市詩云旗亭
出御道游目暫迴車 晉史廷尉張閭住在小市南
史後廢帝元徽二年張敬兒破賊宣陽門莊嚴寺小
市 丹陽記曰苑城市謂之苑市秣陵有門場市

寰宇記云東晉咸和中置七尉右尉在紗市今屬上
元縣鍾山鄉張循王北莊前平地是也 宮苑記南
尉莊草市北湘宮寺前其地在今上元縣治東北
齊東昏侯宮中立宮市使宮人屠沽帝為市魁後主

重關市之征以陽惠明為大市令

湯泉市在上元縣神泉鄉湯山延祥院之前去城六十里

棲霞市在上元縣長寧鄉攝山棲霞寺之前去城四十里

索墅市市有索墅坊在上元縣清化鄉去城五十里

泉都市在上元縣泉水鄉亦名龍都去城五十五里

東流市市有橋曰東流以水流自東因名之在上元縣

宣義鄉去城四十里

花林市南至曹村五里北至大江十二里齊梁諸墳多在其地屬上元縣清風鄉去城三十五里

龍灣市在上元縣金陵鄉去城一十五里

竹篠市在上元縣長寧鄉去城二十里

蛇盤市在上元縣開寧鄉去城二十里有館驛

麒麟市在上元縣開寧鄉去城三十里

西干市在上元縣長寧鄉去城四十五里

章橋市在上元縣長寧鄉去城五十里

石井市在上元縣長寧鄉去城二十五里

五城市在上元縣崇禮鄉去城二十五里

土橋市在上元縣丹陽鄉去城六十里

湖熟市在上元縣丹陽鄉去城六十里

新林市在城西南二十里

板橋市在城西南三十里

銅井市在城西南八十里

東口市在城南長干橋下東今烏衣巷口是

西口市在城南長干橋下今西街口是

小口市在城西南江寧縣安德鄉

朱門市在朱門南

水橋市在江寧縣歸善鄉

杜橋市在江寧縣萬善鄉去城四十里

路口市在城南七十里

倉頭市在句容縣仁信鄉去城九十里

柴溝市在句容縣琅邪鄉去城七十五里有館驛

白土市在句容縣來蘇鄉

高友步俗名上步在溧陽縣南二十五里

周城步在溧陽縣西南四十五里

上興步在溧陽縣西六十里

黃連步在溧陽縣西北五十五里

街巷

古御街按宮城記吳時自宮門南出至朱雀門七八里

府寺相屬晉成帝因吳苑城築新宮正中曰宣陽門南對朱雀門相去五里餘名為御道夾道開御溝植槐柳梁武帝克襄昏焚其奢淫服六十二種於御街今自天津橋直南夾道猶有故溝皆在民居即古御街也又有古御街在臺城西掖門外按宮苑記吳太初宮北曰玄武門北直對臺城西掖門前路東即古御街是也其實自大司馬門出為御街自端門出為馳道自西掖門出為古御街端門即閭闔門

朱雀街按宮城記自宮門南出來苑路至朱雀門七八里府寺相屬輿地志云朱雀門北對宣陽門相去六里名為御道夾開御溝植柳環渠吳紀曰天紀二年衛尉岑昏表修百府自宮門至朱雀橋夾路作府舍又開大道使男女異行夾道皆築高牆瓦覆或作竹藩庾闡揚都賦云橫朱雀之飛梁豁八達之遐衝

考證世說曰宣武出鎮南州謂王東亭曰丞相初營建業無所因承而制置紆曲方此為劣東亭曰此丞

相乃所以為巧也江左地促不如中國若使阡陌條
暢則一覽而盡故紆餘委曲若不可測今臺城在府
城東北而御街迤邐向南屬之朱雀門則其勢誠紆
迴深遠不可測矣 侯景緣淮作塘自石頭至於朱
雀街十餘里中樓雉相屬 宋彭城劉悛司空勔之
長子勔見害於朱雀街悛兄弟平生不行此路
焚衣街在御街

考證齊東昏侯製四種冠五彩袍一月中二十餘出

晨出三更歸夜出清晨返梁自襄陽出師廢東昏侯
焚奢淫異服六十二種於御街後人號其所曰焚衣

街

楊虞部詩雉頭金鑊及珠胎煙結香雲畫不開御
路旁人空歎息逡巡紅焰作青灰馬野亭詩王

指親裁五彩衣尚方工作極纖奇看來亡國都緣此
藝向通衢了不遺鵲羽化為青燒去雉頭還有紫煙
隨更須大字書華表
要使將來盡得知

孔子巷在青溪側大仁寺前西南古長樂橋東一里

考證輿地志云孔子廟在樂遊苑東隔青溪奉聖亭
侯所奉之廟也舊在溪南丹陽郡之東南本東晉所

立中廢宋元嘉十九年詔復孔子廟至齊遷於今處
以舊地為浮圖今名孔子寺亦名孔子巷在城東南
五里古長樂橋東建康實錄晉孝武太元十一年
立宣尼廟故丹陽郡城前後移廟過淮水北以舊處
為孔子寺亦呼其巷為孔子巷

國子監巷今鎮淮橋北御街東舊比較務即其地
考證南唐跨有江淮鳩集典墳特置學官濱秦淮開
國子監里俗呼為國子監巷

烏衣巷在秦淮南晉南渡王謝諸名族居此時謂其子弟為烏衣諸郎今城南長干寺北有小巷曰烏衣去朱

雀橋不遠

舊志

考證丹陽記曰烏衣之起吳時烏衣營處所也 晉

記江左初立琅邪諸王居烏衣巷王敦謀逆導憂覆族使郭璞筮之卦成嘆曰吉無不利淮水竭王氏滅子孫繁衍 世說王導曰庾元規若來吾角巾還烏衣南 王僧虔為御史中丞領驍騎將軍甲族由來

不居此官王氏分枝居烏衣者位宦微減僧虔為此
官乃曰此是烏衣諸郎坐處我亦可試為爾建康
實錄云紀瞻立宅於烏衣巷屋宇崇麗園池竹木有
足賞翫焉吳虎臣能改齋漫錄云今世小說尤可
笑者莫如劉斧撫遺所載烏衣傳引劉禹錫王謝堂
前之句遂謂唐朝金陵人姓王名謝因海舶入燕子
國其實以烏衣為燕子國不知王者王導等人謝者
謝鯤之徒也按世說諸王諸謝世居烏衣撫遺之說

亦何謬耶 藝苑雌黃云按輿地志晉王氏自立烏衣宅當時諸謝曰烏衣之聚皆此巷也王氏謝氏乃江左衣冠之盛者故杜詩云王謝風流遠又云於今王謝即比觀劉斧撫遺乃以王謝為一人姓名其言既怪誕遂託名於錢希白終篇又以劉夢得詩實其事希白不應如此謬是劉斧妄言耳 宋書云謝鯤風格高峻少所交納惟與族子靈運瞻曜洪微並以文義賞會共宴處居在烏衣巷故謂之烏衣游鯤五

言詩云昔為烏衣游戚戚皆子姪其地在今城東南

五里

劉禹錫朱雀橋邊野草花烏衣巷口夕陽斜舊時王謝堂前燕飛入尋常百姓家有釋此詩者

云烏衣者士服之多也朱雀橋邊野草花喻無大賢也烏衣巷口夕陽斜謂歲久儒服少也可憐王謝堂

前燕謂二賢舊居不存也飛入尋常百姓家謂此地俗人所居傷其時乃作是詩也楊虞部詩人物風

流往往非空餘陋巷說烏衣舊時簾幕無從覓祇有年年社燕歸朱存詩闕閤淪亡榷榷移年年舊燕

亦雙歸茅簷葦箔無冠蓋不見烏衣見白衣任斯庵詩羊車暇日旁揮塵玉樹春風自滿庭欲問烏衣

舊時事靜無秋燕有秋螢曾極詩吳兵曾駐黑雲都江左矣吾此定居休祀烏衣輕馬糞懸鵲結駟總

丘墟○馬野亭詩依依燕子可憐生相向於人直有情不道華堂曾止息如今窮巷莫經營六朝盛事同

流水千載遺蹤只舊城白日飛忙難語此話時須等
夕陽明 閩名 烏衣池館一時新晉宋齊梁舊主
人無處可尋王謝宅
落花啼鳥秣陵春

運巷在今天慶觀相接

考證沈約自序曰王父從官京師義熙十一年高祖
賜館於都亭里之運巷 世說叙錄冶城在今運巷
東舊里亭今俗呼為黃泥巷

主簿巷在明道書院右

考證明道先生程純公嘗為上元主簿政教在人至

今呼為主簿巷

坊里

鍾山坊在行宮前東夾道

石城坊在行宮前西夾道

東錦繡坊在御街左

西錦繡坊在御街右

狀元坊二一在御街左東錦繡坊南一在府學南

報恩坊在御街右西錦繡坊南

安樂坊在御街右報恩坊北

金泉坊在御街右報恩坊南

嘉瑞坊在御街左狀元坊南

舜澤坊在御街右金泉坊南

金陵坊在御街右舜澤坊南

建業坊在御街右鎮淮橋西北

長樂坊在御街左鎮淮橋東北

招賢坊在府治南

經武坊在府治左

武勝坊在府治東北

細柳坊在都統司後軍寨前

青溪坊九曲坊並在府治東

嘉會坊在總領所前

尊賢坊在明道書院之右

東市坊在魚市東

鳳臺坊在魚市南

西市坊在魚市西

鷺州坊在魚市北

長春坊在東市之東

寬征坊在西市之南

清化坊欽化坊並在西市之北

朝宗坊佳麗坊並在西市之西

保寧坊在保寧寺前

廣濟坊在廣濟倉南近水西門

武定坊在鎮淮橋東南

崇勝坊在鎮淮橋西南

長千里在秦淮南

考證越范蠡築城長干 丹陽記大長干寺道西有

張子布宅在淮水南 吳都賦曰長干延屬飛甍舛

互李喜注江東謂山間為干建業之南其間平地吏

民居之故號為干 實錄云長干是里巷名江東謂

山隴之間曰干建康南五里有山崗其間平地民庶

雜居有大長干小長干東長干並是地里名小長干

在瓦棺南巷西頭出江

羅北谷詩山隴中間號曰干此長千里盛衣冠想應王謝

朝回後日日行人看繡鞍

鳳凰里在今保寧寺後

考證宋元嘉十四年大鳥二集秣陵民王覬園中李

樹上大如孔雀頭足小高毛羽鮮明文綵五色聲音

諧從衆鳥如山鷄者隨之行三十步頃東南飛去揚

州刺史彭城王義康以聞改鳥所集永昌里為鳳凰

里今保寧寺是其處

表孝里在漂水縣

考證乾道四年邑人伊小乙割肝以療母疾知縣陳嘉善榜其居旌之

鄉社

金陵鄉

縣北

慈仁鄉

縣東

鍾山鄉

縣西

北城鄉

縣東

清風鄉

縣東

長寧鄉

縣東

惟政鄉

縣東舊名惟信

開寧鄉

縣東

宣義鄉

縣東

鳳城鄉

縣東

清化鄉

縣東

神泉鄉

縣東

丹陽鄉

縣東南

崇禮鄉

縣東南

泉水鄉

縣東南

道德鄉

縣東

盡節鄉

縣南

長樂鄉

縣東

右十八鄉隸上元縣

鳳臺東鄉

鳳臺西鄉

並縣東南

安德鄉

縣西

新亭鄉

縣東

隨車鄉

縣西

光宅鄉

縣西

開元鄉

縣南

萬善鄉

縣南

長泰南鄉

縣南

長泰北鄉

縣南

馴翬鄉

縣東

惠化鄉

縣南

葛僊鄉

縣東

建業鄉

縣南

永豐鄉

縣東

歸善鄉

縣西

處真鄉

縣西

銅山鄉

縣南

朱門南鄉

朱門北鄉

縣南

橫山南鄉 橫山北鄉 縣南

右二十二鄉隸江寧縣

句容鄉 縣東 福祚鄉 縣南 臨泉鄉 縣西 上容鄉 縣南

承仙鄉 縣南 政仁鄉 縣南 茅山鄉 縣東 崇德鄉 縣南

來蘇鄉 縣東 望僊鄉 縣東 移風鄉 縣東 孝義鄉 縣北

仁信鄉 縣北 鳳壇鄉 縣西 琅邪鄉 縣西 通德鄉 縣西

崇信鄉 今廢

右十七鄉隸句容縣

上元鄉

縣東

思鶴鄉

縣西

贊賢鄉

縣南

白鹿鄉

縣東

豐慶鄉

縣東

歸政鄉

縣東

崇賢鄉

縣北

長壽鄉

縣北

山陽鄉

縣南

崇教鄉

縣西

游山鄉

縣南

僊壇鄉

縣東

安興鄉

縣東

儀鳳鄉

縣南

永寧鄉

縣西

唐昌鄉

縣東

立信鄉

縣西

右十七鄉隸溧水縣

永成鄉

縣東

福賢鄉

縣東

舉福鄉

縣西

明義鄉

縣西

惠德鄉

縣南

德隨鄉

縣南

從山鄉

縣西

桂壽鄉

縣西

奉安鄉

縣西北

崇來鄉

縣西北

來蘇鄉

縣北

允定鄉

縣北

右十三鄉隸溧陽縣

本縣舊領鄉十七端拱元年割昭德豐樂彰德三鄉屬建平縣

嘉祐六年分成樂鄉併入永成福賢二鄉今領鄉十三

鋪驛

驛路五十一鋪每鋪相去十里

東門鋪

東十里鋪

蛇盤鋪

麒麟鋪

東流鋪

崑崙埋鋪

張橋鋪

以上七鋪屬上元縣

江城湖鋪

宣家峴鋪

山口鋪

廟林鋪

下蜀鋪

紀大店鋪

以上六鋪
屬句容縣

右十三鋪係東路直抵鎮江府界炭渚鋪

土門鋪

夾埭鋪

遲店鋪

清水亭鋪

園墓橋鋪

秣陵鋪

李村鋪

路口鋪

烏圻橋鋪

以上九鋪
屬江寧縣

方墟鋪

石頭埭鋪

烏山鋪

齊家店鋪

南亭埭鋪

南十里鋪

蒲塘鋪

三角子鋪

孔家埕鋪 土山鋪 羅家林鋪 戴公埕鋪

漆橋鋪 朱家店鋪 湯師娘鋪 松兒埕鋪

以上十六鋪
屬溧水縣

右二十五鋪係南路直抵廣德軍界顧置鋪

越臺鋪 石子埕鋪 官莊鋪 板橋鋪

三城湖鋪 江寧鋪 青松林鋪 銅井鋪

葛家埕鋪
以上屬江寧縣

右九鋪係西路直抵太平州界慈湖鋪

府前鋪

西門鋪

石碑衝鋪

靖安鋪

以上屬上元縣

右四鋪係北路直抵滁州界宣化鋪

縣路十一鋪每鋪相去二十里此係諸縣不通驛路處
遞傳之路

石井鋪

七里埕鋪

右二鋪屬上元縣界

周郎橋鋪 縣西門鋪

右二鋪屬句容縣界

縣東門鋪 芟塘鋪 破湖鋪

右三鋪屬溧水縣界

黃運步鋪 中橋鋪 烏山村鋪 縣西門鋪

右四鋪屬溧陽縣界

永寧驛舊基在南唐儀仗院今為待漏院而驛徙置總
領所西閃駕橋之南紹興十五年晁公謨之建

江寧驛在江寧縣西南五十里

秣陵驛在江寧縣南五十里

七橋驛在溧水縣南七十五里歲久圯壞僅存故址淳熙中重建榜曰迎華堂

石頭驛張九齡有候使石頭驛樓詩李白答裴侍御先行至石頭驛以書見招詩云君至石頭驛寄書黃鶴樓夢筆驛

考證江淹集云嘗宿於冶亭夢見一夫自稱郭璞謂淹曰吾有筆在公處多年可以見還淹乃探懷中得五色筆一管以授之嗣後為詩絕無美句時人謂之

才盡按建康有冶亭在冶城又有東冶亭在秦淮上
皆六朝士大夫餞送之所淹本集所載始末皆建康
事也夢筆驛不知在何處 庚溪詩話云夢筆驛江

淹舊居

姚宏詩一宵短夢驚流俗千載高名掛里閭
遂使晚生矜此意癡眠不請半行書

曾極

詩晉尚清談筆力衰文章高下亦隨時
景純不作文通死五色毛雞付與誰

金陵驛亦名蛇盤驛在上元縣長樂鄉蛇盤市俗呼余
婆音之訛也淳熙十二年留守錢公良臣建

考證曾極有蛇盤驛詩

枳蘿華屋半彫殘列肆屠羊
客卸鞍霸氣銷沉形勝歇龍

盤何事作蛇盤 王半山題憶昔東遊未有鬚扶衰
重此駐肩輿市中年少今難在魯老當街六十餘又
重岡古道春風裏草色花光似故人
却喜此身今漫浪田家隨處得相親

東陽驛西至金陵驛四十五里淳熙十二年畱守錢公
良臣建

柴溝驛西至東陽驛十五里淳熙十二年畱守錢公良
臣建

下蜀驛西至柴溝驛十五里東至鎮江府界十五里紹
興八年三月己巳車駕未入建康次下蜀驛有御座在

馬淳熙十二年留守錢公良臣重建驛

太平驛在溧陽縣治西街北太平興國六年建嘉定十

三年重建

望僊驛舊在句容縣治南元豐二年移縣治東

漆橋驛在溧水縣南七十五里

官塘驛在溧水縣東南二十五里

坊墟驛在溧水縣北三十五里

淮源驛在溧水縣東北三十五里

儀賓驛在溧水縣南一百一十里

招賢驛在溧水縣南一百一十里

蒲塘驛在溧水縣南二十五里

白馬驛在溧水縣東南四十里

延賓驛在溧水縣西四十七里

青陽驛在句容縣東二十里

竹里驛在句容縣北六十里倉頭市

雲亭驛在句容縣

右自漆橋以下十二驛今並廢

昭華驛在句容縣開寶中焚圯太平興國二年移縣街東或云望僊驛是也

中山驛在溧水縣南三十步惠政橋西南

考證偽吳順義中置後知縣李彥重建偽唐昇元二年蕭儼添置軒廊建炎焚毀紹興八年李朝正重建魯訢作記嘉定十五年史改之重修添置廊廡紹定四年史彌鞏重修來者便之

馬驛二所在下蜀東陽寶慶二年重修

道路

秦皇馳道

考證秦始皇三十六年東遊自江乘渡江馳馬於此

王荆公詩穆王得八駿萬事不期修落落千載間復此好遠遊車輪與馬跡此地亦當留想當治道時勞者尸如丘

吳帝馳道

考證吳都賦云朱闕雙立馳道如砥

宋帝馳道

考證宋書大明五年孝武初立馳道自閭闔門至於朱雀門為南馳道又自承明門至玄武湖為北馳道八年罷南北二馳道景和元年復立宮苑記宋築

馳道為調馬之所

楊虞部詩路平如砥直如絃官柳十株翠拂烟玉勒金羈天下駿急

於奔電更揮鞭

馬野亭詩南城來到北城隅更北

直趨玄武湖一上雕鞍三十里兩旁官柳數千株六

朝都邑真如此舊日咸秦得似無暑

月行人不張蓋漫天自有翠磨厰

小丹陽路今在江寧縣橫山鄉陶吳鎮西南十里與太

平州當塗縣接界里俗猶呼丹陽

考證晉咸康三年歷陽內史蘇峻叛陶回謂庾亮曰
峻知石頭有重城不敢直下必向小丹陽南道步來
宜設伏邀之可一戰擒也亮不從峻果自小丹陽來
迷失道夜行無復部伍亮聞乃悔之

黃城大路在今上元縣清風鄉黃城村

考證梁太清二年侯景遣軍至江乘拒邵陵王綸趙
伯超謂綸曰若從黃城大路必與賊遇不如徑指鍾

山突據廣莫門出賊不意城圍必解

湖頭路在今玄武湖東北

考證南史東昏侯永元二年崔慧景奉江夏王內向
遣中領將軍王瑩都督衆軍據湖頭築壘上帶蔣山
又王敬則舉兵朝廷遣沈文季持節都督屯湖頭備
京口路

白楊路在城南十里石崗之橫道

考證陳大建末始興王叔陵反部麾下度小航將趨

新林蕭摩訶追擒於白楊路

馬野亭詩此路如何名白楊白楊林木若非良

聞知宰樹常多種想見塙壁在兩旁三國英雄塵一害六朝興廢字千行行人過此休惆悵往古來今總混茫

竹里路在句容縣北六十里倉頭市東有竹里橋南邊山北濱大江父老云昔時路行山間西接東陽遶攝山之北由江乘羅落以至建康宋武帝討桓玄其路經此今城東余婆崗至東陽路乃後世所開非古路也

謝玄走馬路在上元縣崇禮鄉土山下至今不生草詳

見土山下

姜已路在小茅山後通延陵

考證真誥秦時有士周大賓及已陵侯姜叔茂者來
住句曲山下秦孝王時封侯故以姜已名其路

制使姚公希得任內甃砌街道先是東西錦繡坊及經
武坊一帶街衢多有損壞缺陷去處不便往來景定三
年三月十七日興工至四月二十日畢重新布砌用磚
二十餘萬口工物總費五萬二千一百餘緡米六十一

石七斗有奇

橋梁

天津橋在行宮前舊名虹橋政和中蔡公凝建為石橋
號曰蔡公橋後改今名

考證天津本西京大內前橋名即康節邵雍聞杜鵑
處今移其名於此不忘京師之思也

石龜翁逢龍詩
下馬過天津聽

傳禁漏頻惟憐一橋月曾照六朝人金剝宮門宇紅
飛粉壁塵中官來宿內因問帝鄉親周彥大詩下
車聊復問何如尚憶重來四紀餘鐘阜秦淮俱好在
祇憐雙鬢自蕭疎群鯨去作蔣山遊路轉天津遠御

溝忽作故都禾黍恨

洛陽宮殿鎖千秋

鎮淮橋在今府城南門裏即古朱雀航所

舊志

考證按世說叙錄及輿地志丹陽記皆云吳時南津橋也名曰朱雀航大寧二年王含軍至丹陽尹溫嶠燒絕之以遏南衆定後京師乏良材無以復之故為浮航至咸康三年侍中孔坦議復橋於是稅航之行者具材乃值苑宮初創材轉以治城故浮航相仍至太元中驃騎府立東航改朱雀為大航

晉起居注

曰白舟為航都水使者王遜立之謝安於橋上起重樓上置兩銅雀又以朱雀觀名之 實錄云咸康二年新立朱雀航對朱雀門南渡淮水亦名朱雀橋本吳南津大航橋也王敦作亂溫嶠燒絕之權以浮航往來至是始議用杜預河橋法長九十步廣六丈冬夏隨水高下浮航相仍至陳每有不虞之事則剔之 晉書王敦作逆明帝以應詹都督朱雀橋南諸軍事 齊高祖討袁粲黃回與粲通謀蕭順之率家兵

據朱雀橋回遣覘之遂不敢出 梁高祖以義師伐

東昏東昏使江道林率兵出戰退保朱雀航憑淮自
固東昏又遣王珍國等列陣於航南開航背水以絕
歸路與王茂等戰敗一時投淮死者積屍與航等後
至者乘之以濟 北齊兵至故秣陵陳高祖分兵禦
之遣杜稜頓航南 元徽中賊黨杜黑蠡分軍向航
劉劬禦之敗死 侯景兵至航建康令庾信率兵屯
航北見景至命徹航始除一舶棄軍走南塘遊兵復

閉航渡景乘勝至闕下 乾道五年留守史公正志

重造得舊址增廣一丈郡從事丘崇為之記

乾道五年十一月

月建康府重作鎮淮飲虹二橋六年正月橋成惟二橋橫跨秦淮據府要衝自江淮吳蜀游民行商分屯之旅假道之賓客雜處旁午肩摩數擊窮日夜不止淮水至其下奔流而西勢益悍湍激射衝齧滋甚昔之為橋者又不暇顧計久遠薄費而亟成重負而弱植之無何輒壞則姑補苴其甚僅取不廢歲糜緡錢數百多或至十岌岌自若也留守待制史公厥既治成有廢必舉大備都邑之制乃因民所欲為作而新之率增其舊四之一鎮淮長十有六丈為二亭其南屬民以詔令飲虹長十有三丈加屋焉凡十有六楹而並廣三十有六尺基以巨石甃以厚甃十尋之材世守之上必堅必良是度是營而屬其事於浮圖氏

致勝法才又躬為程度俾以從事創意靡密有非工
人所迫及者訖其成無一不合規模壯大氣象雄偉
隆隆相望闡閭四合軍民父老扶携縱觀推美誦休
曰公誠勞噫公所建立大於此者不可殫紀橋未足
多也惟厥經始人徂故常役大用宏謂不可為公決
作之未既累月十世之利卒號有濟人乃大服推是
而言則天下事有可以為而又以為不可為者獨橋
歟彼能者處之雖若不可以為而卒為之以成者又
獨橋歟公名正志字志道南徐人左

文林郎建康府觀察推官丘崇記

開禧元年丘公崇

來為留守重建橋劉叔向為之記

金陵為古天險之區城郭宮室凡幾

變矣而秦淮則猶故也跨淮而濟者有橋曰鎮淮在
吳為南津大桁在晉為朱雀航曰飲虹在晉宋間為
萬歲橋據都邑之衝屹波流之湍車馬如雲千艘鱗鱗
北拱行闕鯨臥虎蹲此二橋者蓋與秦淮相終始而邦

人所恃以為安也歲在己丑今留守教學侍郎丘公以掄魁入幕府觀斯橋之將顛毅然取而更造之規模調度有公所述豐碑在焉後三十五年鯨鱗符而來則橋非舊矣乃庀工度材徹舊架新縱橫廣袤一視前日惟初二祠於鎮淮之上漸復晉人銅雀觀之遺意而兩亭各浚巨井以濟民之乏經始於嘉泰甲子十月庚戌明年乙丑三月丁卯橋成會其費為緡錢萬四千有奇而錙銖不以累諸人也嗟乎物之興廢豈偶然哉韓文公記王中丞新修滕王閣有曰此屋不修且壞前公為從事此邦適治新之公所為文實書在壁今三十年而公來為邦伯又易新之維此二橋與滕王閣之事適相似然惜不得當代宗工鉅儒如文公者大書特書之爾開禧改元三月望從事郎建康府觀察推官劉叔向記

寶祐四年

橋壞於潦留守馬公光祖重建之梁椅為之記

周夏

官掌邦政而其屬有司險以成橋梁鄭大夫能整比其國至褰裳漆浦者與之則謂之不知政金陵故有橋曰鎮淮曰飲虹雄跨秦淮水集澗谿貫城邑以達於江奔流駛湍衝撼激射雨甚勢益橫不可俯而車馬憧憧無停晷商人戍夫與諸道貢輸之入於餽餽者舳舻屢摩橋不得休息大抵亡慮數十年輒弗支竇祐乙卯東陽馬公自戶部尚書出鎮越明年修戎器繕闢艦舩游擊營而奎翰之堂邇傳之舍據史之居哲人勝士之流風餘址諸凡經度以序即功向二橋適同圯於潦公不移日召匠飭材以通判何君宗姚菰銖寸從官出工人歡趨歲十月橋成修廣如其舊加堅績焉萬井繁環遙岑掩映如巨鼇鼎負冠山以與陽侯角武而爭雄也東西行者胥咨嗟詠歌以德公賜噫公之德於民獨橋哉橋餘事也然過都越國往往傾侈利闕聽民揭且厲水怒至即相望如萬里隔間起而圖之則又以其隱民者厲民故君子

於以占政焉天地間運動流行一精神耳人以精神
為事業則櫛比而髮理樞旋而戶隨鉅網細目疇不
在精義利用中公表裏忠勤炯炯心目環吾土皆若
車轍馬跡朝夕至者橋詎足煩公咄嗟哉然嘗觀留
侯客下邳間從容步游圯上而老人者以兵法授之
迄持以興漢茲豈適相邂逅然耶憑高而眺遠臨流
而觀逝子房於是志念深矣是邦一瞬關河公方蚤
夜秣馬厲兵思繫單于頸獻闕下而橋西直天塹東
扶龍蟠志士忠臣過而生慨安知無衣褐之翁跪履
之子把六韜三略徃來論議其上將赴公精神以濟
登四海焉亦如此橋矣試以斯文招之門生從政郎
差充沿江制置使司幹辦公事梁椅謹記門生朝奉
郎差充沿江制置使司參議官胡居仁謹書并題蓋
六年橋燬於火留守趙公

與憲重建

飲虹橋一名新橋在鳳臺坊

考證建康實錄南臨淮有新橋本名萬歲橋後改名
飲虹新橋乃吳時所名至今俗呼為新橋襲其舊也
乾道五年史公正志重建上為大屋數十楹極其壯
麗與鎮淮橋並新丘崇記之 開禧元年丘公崇重
建劉叔向記之 寶祐四年馬公光祖重建梁椅記
之鎮淮橋每與此橋同建諸記並附鎮淮橋下茲不
復載

日華橋在行宮城東華門跨護龍河

月華橋在行宮城西華門跨護龍河景定二年馬公光
祖重建

東虹橋在行宮之左府治之北景定二年馬公光祖重
建自書橋榜

西虹橋在景定橋北運司東景定二年馬公光祖重建
自書橋榜

景定橋在永寧驛北舊名清化俗呼為閃駕橋景定二

年馬公光祖重建改今名自書榜跨運瀆

太平橋在運司西南舊名欽化俗呼為筴橋景定二年馬公光祖重建改今名自書榜跨運瀆

鼎新橋在太平橋西舊名小新景定二年馬公光祖重建改今名自書榜

乾道南北二橋在古運瀆上今斗門橋北二橋相望乾道中洪公遵建景定二年馬公光祖重建自書榜

斗門橋在乾道南橋之南景定二年馬公光祖重建自

書橋榜跨運瀆

武定橋在鎮淮橋東北淳熙中建景定二年馬公光祖
重建自書橋榜

崇道橋在天慶觀東景定二年馬公光祖重建自書橋
榜

武衛橋在天慶觀西舊名望僊橋景定二年馬公光祖
重建改今名自書榜

廣富橋在月華橋北跨護龍河景定二年馬公光祖重

修

武勝橋在府治親兵教場即北門橋

青溪七橋按實錄注最北樂游苑東門橋

樂游苑在覆舟山南橋宜

與今散福亭相連

次南尹橋今潮溝大巷東出度此橋次南雞

鳴橋

即輿地志今所謂新安寺南東出開善寺路度此橋

次南募士橋次南菰苴

橋一名走馬橋次年青溪中橋在湘宮寺門前巷東出

度溪有桃花園次南有青溪大橋

今城東北有渠北通玄武湖南行經散福

亭橋竹橋抵府城東北角外西入城濠里俗呼為長河即古青溪本在今竹橋西南行五代楊淳於此截溪立

城由是青溪半在城外其在城中者歲久堙塞但城東北隅迤邐至上元縣治東南上水閘以西一帶青溪遺迹或見或隱橋亦不詳所在

青溪中橋按建康實錄青溪七橋次南

中橋今上水閘里俗相傳青溪中橋路

齊書始安王遙先反曹虎領軍

屯青溪中橋陳書隋軍陷臺城後主與張貴妃俱入井隋軍出之晉王廣命斬貴妃勝於青溪中橋即此地

青溪大橋按石邁古跡編實錄云東出句容大路度此

橋西即陳尚書令江摠宅今上元縣東南百餘步段氏

居乃江摠宅也橋宜在此宅之東歲久堙廢今不復有

橋矣舊稱青溪九曲蓋自玄武湖引水從東北紫迴

達於秦淮其曲折有九故於其間跨橋有七今城外青溪皆已堙塞橋廢久矣惟城內僅存一曲溪上長橋有四皆馬公光祖所作也

運瀆六橋按實錄云孝義橋本名甍子橋次南楊烈橋宋王僧虔觀鴨處次南西州橋宜在今筮橋西次南高暉橋建康西尉在此今建興寺北路東出度此橋宜在今乾道橋左右次南禪靈寺橋對禪靈渚宜是今斗門橋按建康實錄注古城西南行者是運瀆古城苑城

也吳大帝赤烏三年使御史郝儉鑿城西南自秦淮北抵倉城名運瀆即此瀆是也今宮城西北興嚴寺前有溝迤邐至清化市東乃古運瀆但自此西南悉堙塞不復可辨雖東南為宮城西塹疑非古跡然由宮牆塹至清化橋西折過欽化橋再南則運瀆舊迹復見今乾道橋一帶河是也六橋所在亦可髣髴得其次第清化橋即閃駕橋欽化橋即笄橋今橋與名皆非舊矣閃駕橋為景定橋欽化橋為太平橋皆馬公光祖之所重建詳

見於前

飛虹橋楊文公談苑云徐常侍鉉仕江南日嘗直澄心堂每襍被入直至飛虹橋馬輒不進裂鞍斷轡筆之流血掣韁却立鉉貽書於餘杭沙門贊寧答云下必有海馬骨水火俱不能毀惟漚以腐糟隨毀者乃是鉉斲之去土丈餘果得巨獸骨上脰可長三尺腦骨若斷柱積柴焚三日不動以腐糟纔漚之遂爛焉南唐有虹橋小虹橋飛虹橋皆傍宮橋也

南渡橋李白與酒客數人棹歌秦淮往石頭訪崔四侍
御詩云捨舟共連袂行上南渡橋乃秦淮上橋也今不
詳其處

張侯橋吳張昭所造故名之晉義熙六年盧循焚查浦
進至張侯橋其地在今城南不詳其處

赤蘭橋杜祭酒別傳曰桓宣武館於赤蘭橋南曰延賢
里今城南有赤蘭坊橋不詳其處

長樂橋唐秦淮上有長樂橋又曰長樂渡在縣東南六

里今桐林灣是其地隸長樂坊

獅子橋在城北湘宮寺北

回龍橋在城西門

白下橋一名上春橋在城東門外其側有白下亭

重建橋記

金陵為六朝故都風土遺迹歷歷可攷自

義訪諸故老無傳焉宋元徽間征北將軍張永屯白下唐武德中遷金陵縣於白下村其地蓋在東晉白石壘之下也國朝自六飛南駐以是邦為陪都白下一橋當江浙諸郡往來之衝不惟士夫民牧所必經行而日飲萬馬於秦淮旬給諸屯之糧餉舍此無他道也舊架木為之歲久朽蠹若將壓焉人以病告前

後邑宰熟跡而不敢為三衢鄭君緝視事之初竊鄙
前人作計之不遠毅然欲取而更新之未幾運石山
積下築萬椿曰吾將以石易木為千百年不朽之利
觀者且喜且駭疑不克就甫五閱月而橋成長鯨卧
波飛梁駕虛材良石堅天造地設雖怒濤激湍疾風
甚雨而過者如登康莊得大安穩旁有宿餞之亭因
橋而名亦就摧剝併葺治之更增其前楹三雄壯竊
深氣象更別上元為邑賦筭一孔以上悉輸州家傾
囊倒布力弗能繼謁諸閭臺得絡錢合二千朱斛百
自嘉泰癸亥九月壬午首事明年二月戊午訖工會
其費為錢幾四百萬顧不輕矣而十八鄉之民曾不
與知雖畚鍤與負不煩一人既成或者以白下之語
不宜於舉子請更之留帥文昌李公名以上春權也
嗚呼橋梁不修漢薛宣歟然於彭城之政徒扛輿梁
易事也子產之智不及之鄭君垂大惠於笈談間是
可書也因其請故不復辭嘉泰四年三月望日從事

郎建康府觀察
推官劉叔向記

長干橋在城南門外五代楊溥城金陵鑿濠引秦淮逶
城西入大江遂立此橋

銅橋在城東一十里按五代史李昇天祚三年十一月
以步騎八萬講武於銅橋今字作桐訛也

高橋在城東一十五里屬上元縣長樂鄉

考證金陵故事云梁亂庾信為建康令守朱雀門衆
潰臺城門已閉信走羈旅於此橋信有哀江南賦云高

橋羈旅是也 石邁古跡編云皋橋舊名高橋按庾
信哀江南賦注云吳郡圖經以皋伯通所居因名其
橋曰皋後人轉皋為高 南史齊徐嗣徽等復入丹
陽至湖孰陳高祖追侯安都安都率馬步拒之於高
橋 記室新書云高橋羈旅之士 按郡國志云通
門內有橋即漢皋伯通居此橋以得名梁鴻賃舂之
所是吳自有皋橋在建康者乃高橋也庾信賦南史
皆曰高崔令欽注石邁古跡編易高為皋紹興十七

年本縣新治橋路易榜曰皋橋因承其誤失於不考耳

石步橋在城東北四十五里即古羅落橋也

考證宋高祖起義丹徒進至羅落橋遇皇甫敷檀憑之戰死即此地下有羅落浦北大江又有羅落坊羅落干羅落山皆在其處今石步酒坊名羅落坊

錢公橋即章橋以西接張山亦曰張橋在府城東北五十七里上元句容二縣以此橋為界

考證建炎元年高宗皇帝幸建康次張橋山水暴溢堤齧橋壞勢甚可畏轉運副使李謨黃崇書被劾俱罷見孫覲所撰李謨行狀淳熙十一年錢公良臣易為石橋運使趙公師揆榜曰錢公橋乾道志以為古羅落橋者非也餘見石步橋

復古橋屬上元縣長樂鄉去縣十四里宣和間賜鍾茅山經此地橋損堙塞久不修復春夏塘水壅遏民頗病涉紹興十年縣治橋路因創復之改名復古橋

葛橋在上元縣崇禮鄉方山東南按齊書李安民傳宋建安王景素反安民破景素於葛橋

墅城橋在城東三十里即晉謝玄別墅之所

檀橋在青溪按齊書劉瓛以儒學冠於當時京師士子貴遊莫不下席受業瓛住在檀橋瓦屋數間上皆穿漏學徒敬慕不敢指斥呼為青溪

亭子橋在上元縣清風鄉黃城之東徐鉉棲霞寺新路記云建高亭於路周跨重橋於川上即此橋也里俗呼

為亭子橋去棲霞寺三里今土橋危險夏潦則民皆病涉

周郎橋在城東八十里上元縣丹陽鄉湖熟鎮下臨橫塘舊志

考證石邁古跡編云舊傳周瑜嘗至此按吳書瑜

渡秣陵破笮融薛禮轉下湖熟此橋正通秣陵必瑜

當時經歷之地

馬野亭詩周郎可是世英豪談笑功成乃不勞兩日阿瞞猶避此茲時小

寇定應逃雙鞭錦領紛相逐大羽青絲各自操料得軍行爭看此霜天健鵲已辭條

土橋在城東七十五里

西流橋在城東北三十里

東流橋在城東北四十里

安濟橋在城東北四十里即東流市橋淳熙十二年錢

公良臣重修改今名

韓橋在城東北三十里

白水橋在城東北二十里

楊堰橋在城東二十里

走馬橋按建康實錄走馬橋東有燕雀湖里俗相傳今府治之東斜橋即走馬橋也橋之東有水平澗是為燕雀湖或云惟政鄉白蕩湖即其地

右隸上元縣境

板橋在城南三十里

考證吳後主聞晉師將至甚懼乃自選羽林精甲以配沈瑩孫振等屯於板橋晉使王濬總蜀兵沿流直指建業司馬伯帥六軍濟自三山遣周浚張喬等接

戰破吳軍於板橋瑩等皆遇害 金陵故事云晉伐

吳丞相張悌死之悌家在板橋西 建康實錄云晉

簡文帝嘗與桓溫及武陵王晞同載游於板橋溫遽

令鳴鼓吹角車驅卒奔欲觀其所為晞大恐求下車

帝安然無懼色溫由是憚服 梁武帝起兵令呂僧

珍與王茂進軍於白坂橋非此也

李白詩天上何所有迢迢白玉繩斜

低建章闕耿耿對金陵漢水舊如練霜江夜清澄長川瀉落月洲渚曉寒凝獨酌板橋浦古人誰可徵元暉難再得灑酒氣填膺曾極詩輪轉千年路欲達板橋名在市朝非元暉太白微吟處獨酌悠然命駕歸

新林橋在城西南一十五里揚州記云金陵南沿江有新林橋即梁武帝敗齊師之處

白坂橋在城南

考證按梁呂僧珍傳武帝次江寧僧珍與王茂進軍於白坂橋築壘壘立茂移頓越城僧珍猶守白坂

秣陵橋在城東南五十里

五城橋唐景雲中造以渡淮廣明元年廢於火南唐保大十年重造國朝開寶八年又廢詳見五城

杜橋在城東南三十里

江寧橋在城南六十里臨江寧浦

木龍橋在城南七十里

河亭橋在城東南一十五里

馬務橋在城東南二十五里唐置馬務於此

真武橋在城東南三十七里

令橋在城東南七十里臨令水

烏剎橋在城東南九十三里

牧馬橋在縣東南三十九里南朝放牧者在此南出有
浦水濶三丈深一丈有橋

右隸江寧縣境

白鶴橋在縣東南三里一十五步茅君內傳云大茅君
每年十二月二日駕白鶴於此會諸真故以名橋

沈公橋在縣南二十五里沈公謂沈慶之也

赭渚橋在縣東一里二百四十一步

歸善橋在縣南一里一百七十五步

於鄉橋在縣南二十五里

西霸橋在縣南三十二里

降靈橋在縣東南二十七里

義城橋在縣南二十里

高平橋在縣西南三十五里

斜橋在縣東五里

柳橋在縣北二十五里有前柳橋後柳橋

懸毒橋在縣西十五里

宣家橋在縣西北三十里

永安橋在縣南十里下有小港歸於秦淮

降真橋舊記云在玉晨觀西句容路三十里橋是也

蘆埭橋在縣南三十里

集僊橋在縣南有詩石可攷

游冠卿題縣之南橋作於元豐之三年元祐改元之

秋歲適大水輿梁為之輒壞往來病涉愁嘆滿道乃請於府而新之購材董役未踰月而功就而橋素無題榜因具路入三茅遂以集仙名之且為小詩以記歲月興廢云南橋頽廢長官差新作川梁代濟舟上應星文橫北極下飛虹影落中流慚無子產乘輿惠謏絕衆公弗道憂路接蓬山仙世界品題今為邑人

留予舊歲得集仙橋詩石上段於平易堂牆南角惜其不全好今年六月十六日風雨終夕又得石下段於堂之西破牆底因粘綴成文併以舊年築地所得龜跌坐此石然隱伏顯露雖各以時向使予不先得之顧今斷石將安用焉特不過礎柱砧衣且橋屋七間工役浩大而興梁之復未知何日觀是詩者可以知邑之事力視昔不侔云又四日記

右隸句容縣境

臨淮橋一名惠政橋在縣南二十步下即秦淮水也舊圖云臨淮橋前任司馬公重建兵火燒毀復造土橋景德二年知縣史良率衆錢重造版橋舊名濁水橋紹興

八年李朝正重建石橋嘉定五年壞於暴漲知縣湯詵
重建石橋榜曰惠政阜田為記

通濟橋在縣南二十五步舊有劉公攸所為記至紹興
八年知縣李朝正重建石橋李南壽作記

巫家橋在縣寨外三百步

棲賢橋在縣南門外西南

易俗橋在縣市中

望京門橋在縣北一里

南門橋在縣南門外皇祐間邑人劉應之重建石橋僧
從雅作記刻石

唐家橋在縣市西二百五十步

樓家橋在縣南門外二百七十步

馬沉橋在縣南去縣三十七里

利涉橋在縣北三里俗呼虎捍橋

安政橋在縣北三里俗呼翻車橋

戴公橋在縣南一十里

俞初橋在縣南一十里舊圖作俞母橋

大覺寺橋在縣東南八里

莆塘橋在縣南二十五里今廢

白沛橋在縣東北三十五里

長樂橋在縣東北二十五里

李墅橋在縣東北三十里

張墅橋在縣東北三十里

段亭橋在縣東六里

板閣橋在縣東二十五里

王師橋在縣東三十三里

神靖橋在縣東南四十三里舊名神龍橋知縣李公朝

正易今名

白馬橋在縣東南四十里

梅塘橋在縣東南一百二十里

鄧步橋在縣東南一百二十里

張沛橋在縣東南八十五里

永昌橋在縣南九十里舊圖云呼為固城橋

漆橋在縣南七十五里

馬墅橋在縣西一十五里

石埭橋在縣西三十五里

湯橋在縣西四十里

孟橋在縣西三十五里

錢埭橋在縣南三十五里

許村橋在縣東南一十二里

右隸漂水縣境

硯瀆橋在縣東北相傳云晉謝公滌硯於此

東石橋在縣東門外

新建橋在縣南門外

謝家橋在縣東

通微橋在縣東南一里

僊人橋在縣南十五里

南崑崙橋在縣東南十八里

北崑崙橋在縣北十里

鄉黨橋在縣南三里

高要橋在縣南二十五里通廣德軍路

高友橋在縣南三十里

故縣橋在縣東南一十五里

青安橋在縣西三里

平陵橋在縣西北三十里今俗呼湖瀆橋或名沙灘橋

平陵城在橋西一里

奉橋在縣南五十里

上興步橋在縣西北六十里

黃連步橋在縣西北五十五里

舒塘橋在縣西北五十五里通漂水縣大路

板子橋在縣西北六十里舒塘橋北

破堰橋在縣西北六十里板子橋北

雨城橋在縣西北六十五里破堰橋北

檀石橋在縣北六十里

三了橋在縣南四十里

石塘橋在縣北二十里

望僊橋在縣南一十里

社渚橋在縣西南六十里

望婆橋在縣西南五十里

橫澗橋在縣東南六十里

金皆橋在縣南六十里

雙澗橋在縣西南五十里

招僊橋在縣西三十里

斗門橋在縣北二十里

馮塘橋在縣北二十里

虎塘橋在縣東北四十里

豆橋在縣南二十里

張野橋在縣南二十里

湖橋在縣西一十八里

僊橋在縣南六十里

王堰橋在縣西南二十五里

洪橋在縣西南六十五里

塘路橋在縣北十五里

徐塘橋在縣西二十七里

徐橋在縣西北三十五里

南陽橋在縣西四十里

西里橋在縣西南六十里

春雨橋在縣東舊曰東市橋嘉定十四年三月知縣陸

子適重修

西市橋在縣西

甃橋在縣北六十里祥符潤州圖經云徑瀆潤一十步
縣西十三里長塘湖北口至江寧府溧陽縣三十七里
春夏水深三尺勝五十石舟秋冬深一尺勝二十石舟
隋大業末宣州永世令達奚明因晉宋之舊加疏決為
橋甃甃兩岸取其堅固今橋在溧陽縣界

嘉定橋在縣西北四十里陵跨中江本名中江橋俗名

中橋或呼為通江橋唐開元中縣令喬翔嘗創浮梁本朝元祐三年建橋曰衆樂傾圯久之公私病涉慶元中縣丞周文璞奉檄興勦伐石粗集而不果成嘉定十一年俞運使建行部命縣尉趙時頌重建改今名

右隸溧陽縣境

二十四航舊在都城內外即浮橋也

考證按輿地志云六朝自石頭東至運瀆總二十四渡皆浮航往來以稅行直淮對編門大航用杜預河

橋之法本吳時南津大橋也一名朱雀橋當朱雀門

下渡淮水王敦作逆溫嶠燒絕之今皆廢

杜牧有詩青山隱隱

水迢迢九月江南草未凋二十四橋明月夜玉人何處教吹簫楊虞卽詩青雀浮航夜照波星繁雲靜

月華多江樓人凭欄干立直下天心耿耿河

四航皆在秦淮上曰丹陽曰竹格曰朱雀曰驃騎

考證按寶錄晉寧康元年詔除丹陽竹格等四航稅

注云王敦作逆從竹格渡卽此航也朱雀航本吳時

大航驃騎航在東府城外渡淮會稽王道子所立并

丹陽郡城後航總為四航 今四航皆廢鎮淮橋即

朱雀航舊所也詳見橋類

楊虞部詩橋上層樓樓上梯秦淮兩岸綠楊堤春風

影動波光碎翬翼孤飛雀並棲 馬野亭要問當時朱雀航秦淮岸口駕浮梁既為銅雀施重屋又作璇

題揭上方波底淨涵樓閣影橋間望斷水雲鄉不知此處今何在須有遺基在兩旁

津渡

石頭津在城西方山津在石頭津之東

考證隋食貨志云郡西有石頭津東有方山津各置

津主一人曹一人直水五人以檢察禁物及亡叛者

龍安津在城西北二十里與真州宣化鎮相對今為靖安渡

南津在城西南

考證金陵故事云南朝置校尉以鎮此津侯景入寇舉朝無殉難之夫惟校尉江子一與第二人同死王事梁書江子一嘗為南津校尉

五馬渡在上元縣西北二十三里幕府山之前晉元帝與彭城等五王渡江處按晉書太安之際童謡云五馬

浮渡江一馬化為龍及永嘉中元帝登大位乃其符云

五馬之名取此

曾極詩仲達欺孤與操同豈能長世撫提封瑤圖暗換君知否班特浮江自化

龍

楊簡詩何事金陵王氣鍾琅邪開幕據江東舟人忽見風雲起一旦龍飛五馬中

麾扇渡在朱雀航之左

考證晉太安二年廣陵相陳敏據建業顧榮密報劉
準率兵臨江敏令甘卓屯橫江榮與周玘因卓兵斷
橋盡收船於淮水南敏自出軍臨大航岸榮以白羽
扇揮之其軍自潰因以為名

楊虞部詩旌旗燦日及凝霜甲馬如龍人似狼

羽扇一麾風偃草策勲多謝顧丹揚馬野亭詩此
扇拈來一羽輕如何退得十千兵百年雨露蒙君賜
一日衣冠繫賊營正欲倒戈為向背遠觀揮手
極分明而今但得旌旗白便可中原取次行

五城渡在上元縣東二十五里

考證晉王敦死王含錢鳳乃率餘黨自柵塘西置五
城造營按圖經五城如却月勢高二丈相去各二十
丈陶季直京都記五城邊淮帶湖祖道送歸多集
此處唐景雲中縣令陸彥恭於城側造橋度淮水
即今之五城渡也

竹格渡按建康實錄王敦作逆從竹格渡即此航也在

今縣城西南二里

輿地志云兩岸要衝處並以航濟西自石頭東至征虜亭凡二十四所平

陳惟此渡獨存今舊橋西是其處

馬家渡在府界上

考證皇朝中興編年綱目載云采石江濶而險馬家

渡江狹而平兩處相去六十里皆與和州對岸昔金

人南侵直犯馬家渡則此渡比采石尤為要害今分

上下二渡

張公凸渡在上元縣金陵鄉長慶村之西正臨大江與
真州六合縣梅家步相對自張公凸渡至南岸夏四十
里冬五十里

考證石邁古跡編云隋文平陳宇文述以行軍總管
自六合濟即此也今皆嚴備

堰埭

浮山堰慶元建康志云在城東南二十里梁天監十三
年築

考證按梁史天監十三年用魏降人王足計欲以水灌壽陽乃假太子左衛康絢節督卒二十萬作浮山堰於鍾離不知何所據也今志云在建康

杜橋堰在城南三十里長五里濶一丈五尺堰杜橋浦水

真武橋堰在城南三十七里長三里濶二丈堰浦水通秦淮

牧馬橋堰在城西南七十里長三里濶二丈五尺堰牧

馬浦水

百堙堰在句容縣西南三十五里通秦淮屬上元縣界
與福祚鄉相接

黃城堰在句容縣東三十里長一里深四丈灌田三百
畝

陶堰在句容縣南六十里其堰逐年填塞不能瀦水屬
臨泉鄉五都

范家堰在句容縣西北三里灣曲長二里深四尺灌田

二百畝在通德鄉第二都

周戴新堰在句容縣南一十五里通百堽堰

於家堰在溧水縣南九十里長一十里

銀林堰在溧水縣東南一百里長一十一里即魯楊五堰也

考證按前漢地理志丹陽郡蕪湖注云中江出西南東至陽羨入海後漢郡國志蕪湖中江在西又水經云中江在丹陽蕪湖縣南東至會稽陽羨縣入於海

孔穎達書義疏亦引漢史為證今蕪湖縣南有支江
俗稱為縣河經縣市中東達黃池入三湖三湖丹陽
顧城石曰湖也至銀林正所謂中江東至陽羨即此也蘇
常承此下流常病飄沒故築銀林五堰以窒之自是
中江不復東而宣歙皆由蕪湖西出達於大江故濱
湖之地皆隄為圩田中江亦漸隘狹故老云當時慮
後人復開此道則蘇常之間必被水患遂以石砌五
堰路又液鐵以固石故曰銀淋今訛為林

分水堰在溧水縣東南一百里長一十五里

若李堰在溧水縣東南一百五里長八里

何家堰在溧水縣東南一百一十里長九里

余家堰在溧水縣東南一百一十五里長一十里春冬

載二百石舟

考證昔吳王闔閭伐楚因開此瀆運糧東通太湖西
入長江南唐書楊行密據宣州孫儒圍之五月不解
行密將臺濛作魯陽五堰拖輕舸饋糧故軍得不困

卒破孫儒魯陽者即於家等五堰是也故道尚存

百坡堰在漂水縣西北一十里長一里濶一丈五尺

竹墩堰在漂水縣西北二十五里長一里濶一丈五尺

烏剎堰在漂水縣西北四十里濶一丈八尺

青泥堰在漂水縣南九十五里長十里

龍盤堰在漂陽縣北六十里檀口橋前長一十步

關堰在漂陽縣西南二十五里

鷄鳴埭建康實錄青溪有橋名募士橋橋西南過溝有

埭名鷄鳴埭齊武帝早遊鍾山射雉至此鷄始鳴圖經
云今在青溪西南潮溝之上又按南史齊武帝數幸琅
邪城宮人常從早發至湖北埭鷄始鳴故呼為鷄鳴埭
若爾其埭又當近北父老傳云今清化市真武廟側是
其處也二埭恐皆當時所歷姑兩存之

楊虞部詩輦出
城時雞未鳴春

羅蟬翼緒袍輕蒙塵獵騎奔如電到此聞鷄第一聲

馬野亭詩臺城五里到青溪埭在青溪西復西向

日只緣禽射雉當時過此始鳴雞鳥暈用處亦無茂
羽翮貢來誰敢指更是遊觀須有節如何晨夕恣荒

迷

方山埭建康實錄吳赤烏八年使校尉陳勲發屯田兵
於方山南截淮立埭號方山埭又按南史湖熟縣方山
埭高峻冬月行旅以為難齊明帝使沈瑀修之瑀乃開
四洪斷行客就作三日便辦其地今去城西四十五里
栢岡埭赤山湖埭也宋元畝傳決破栢岡方山埭以絕
東軍亦曰百岡堰

南埭今上水閘也王荊公贈段約之詩云聞君更欲通
南埭割我鍾山一半青正對今青溪閣

長溪埭在城南五十里濶二丈堰秣陵浦水通秦淮

破崗埭按建康實錄吳大帝赤烏八年使校尉陳勲作
屯田發兵三萬鑿句容中道至雲陽以通吳會船艦號
破崗瀆上下一十四埭上七埭入延陵界下七埭入江
寧界於是東郡船艦不復行京江矣晉宋齊因之梁以
太子名綱乃廢破崗瀆而開上容瀆在句容縣東南五
里頂上分流一源東南流三十里十六埭入延陵界一
源西南流二十六里五埭注句容界上容瀆西流入江

寧秦淮至陳霸先又堙上容瀆而更修破崗瀆隋既平

陳詔並廢之

以此知六朝都建康吳會漕輸皆自雲陽西城水道接至都下故梁朝四時遣公卿

行陵乘舴艋自方山至雲陽謝靈運為永嘉太守隣里相送於方山徐陵上容路碑有云濤如白馬既礙

山

廣陵之江山曰金牛用險梅湖之路莫

不欣茲利涉玩此修渠雲陽今丹陽縣

縣堧在漂水縣東南八十里長二里濶二十里與漂陽縣分界其堧上下有二派上一派西北入縣界

景定建康志卷十六